

[Augsburg], 15. September 1552

An Johannes Oporinus

UB Basel, Fr. Gr. I 11, fol. 161r.  
Steinmann Nr. 662.

S. P. D. M. Simonen Tityum de facie non noui, sed ex crebris eius et doctissimis atque humaniss[imis] ad me literis, valde diligo. Is quum vel spe fortunae melioris (Nam Tubingae rerum suarum satagit) vel, vt ea spes fallat, animi saltem recreandi causa Basileam profecturus esset, literas meas sibi profuturas sperabat. Ego verò etsi ἀπρασίας τῶν βίβλων οὕσης nec apud typographum facile locum ei fore censeo, nec in Academia quicquam vacare puto: tamen cum multa praeter opinionem vtranque in partem eueniant: te Mi Oporine pro amicitia nostra oro, vt si qua se forte occasio dederit, hominis et vtriusque linguae, et philosophiae ac medicinae egregiè periti, et in astrologia magna cum laude versati, vel iuuandi vel ornandi, siue per te siue per alios obtulerit, eam ne praetermittas, sed in meam gratiam, saltem benevolentiam aliquam ei exhibeas. Neque enim tam sum impudens, vt te quicquam cum incommodo tuo facere postulem, et ipse Tityus qua est modestia praeditus, voluntatem tuam et aliorum doctorum a se non abhorrentem in ampli beneficij loco numerabit. Vale. 17. Cal[endas] Octobris. Anno 1552.

Hiero[nymus] W[olfius] T[uus].